

**U ovom broju, između ostalog, čitajte:**

- **U Tuzli otvoren Ured Udruženja poslodavaca FBiH**
- **Vlada USK će održati sjednicu Kolegija o inicijativama za rasterećenje privrede i poboljšanje poslovnog ambijenta 15. jula**
- **UPFBiH održalo sjednicu UO i ponovilo zahtjeve Vladi FBiH**
- **Sastanak u vezi pokušaja iznalaženja rješenja za smanjenje gužvi i čekanja na lokaltetu tunela Vranduk II**
- **Grupacija poslodavaca ZDP pri UPFBiH traži preispitivanje odgovornosti nadležnih u JP Cestama FBiH**
- **ESV KS: Subvencije za plin ugrađene u Prijedlog izmjena i dopuna budžeta Kantona**

Expense by month



Categories	Unit	Dec-15	Jan-16	Feb-16	Mar-16	Apr-16	May-16	Jun-16	Jul-16
1-Personal	0	12,034	13,565	10,674	13,095	16,392	12,357	20,775	24,766
1-Personal	0	345	347	154	1,953	374	534	-	133
1-Personal	1	521	434	178	519	1,850	456	246	346
1-Personal	0	0	2,300	189	90	23	466	764	133
1-Personal	1	12,900	16,646	11,195	15,657	18,639	13,890	25,326	25,599
2-Marketing	2	6,000	2,300	5,000	1,500	1,200	266	1,500	4,600
2-Marketing	1	2,000	5,420	3,000	2,100	0	0	4,252	3,674
2-Marketing	0	8,200	4,900	2,000	8,000	0	0	6,800	7,550

## U Tuzli otvoren Ured Udruženja poslodavaca FBiH

U Tuzli je 29. maja 2019. godine otvoren Ured Grupacije poslodavaca Tuzlanskog kantona pri Udruženju poslodavaca u FBiH.



Ured su presijecanjem vrpce otvorili Jakub Suljkanović, premijer Tuzlanskog kantona, Adnan Smailbegović, predsjednik Udruženja poslodavaca FBiH i Ramiz Karić, predsjednik Grupacije poslodavaca TK pri

UPFBiH. Otvaranje Ureda Grupacije poslodavaca Tuzlanskog kantona pri Udruženju poslodavaca FBiH je korak naprijed u opredjeljenje poslodavaca da organizirano i sistemski djeluju i u saradnji sa institucijama vlasti na nivou kantona i gradova u Tuzlanskom kantonu, sindikatima i drugim partnerima aktivno rade na rasterećenju privrede i poboljšanju poslovnog ambijenta.

„Vlada Tuzlanskog kantona ima dobru saradnju sa poslodavcima i želimo tu saradnju i dalje razvijati. Želimo je podignuti na jedan viši nivo, naročito zbog činjenice da je u proteklih godinu dana privreda i privrednici nekako pala u drugi plan, zbog izbornih i postizbornih tema koje su dominirale. Kao Vlada TK ćemo u najskorije vrijeme



razmatrati zakon o poduzetničkim zonama koje će doprinijeti stvaranju boljeg ambijenta za kompletnu privredu", istaknuo je premijer Suljkanović u obraćanju prisutnima.

Mladen Pandurević, direktor Udruženja poslodavaca Federacije BiH naglasio je opredjeljenje UPFBiH da konkretnim aktivnostima, u saradnji sa socijalnim partnerima predano radi na kreiranju kvalitetnijeg poslovnog okruženja.



„Ured kojeg danas otvaramo u Tuzli ide u pravcu realizacije našeg cilja da u svim kantonima u FBiH imamo urede grupacija Udruženja poslodavaca FBiH. UPFBiH ima jasno definirane ciljeve u pravcu rasterećenja privrede i poboljšanja poslovnog ambijenta. Otvaranjem ovog Ureda Grupacija poslodavaca TK pri Udruženju poslodavaca FBiH svoje aktivnosti unaprijediti i ujedno biti mjesto na kojemu će poslodavci moći dobiti informacije, biti educirani, ali i potražiti načine i modele za rješavanja problema sa kojima se susreću u poslovanju ", kazao je Pandurević.

Ured Grupacije poslodavaca TK pri Udruženju poslodavaca FBiH nalazi se u Ulici ZAVNOBiH-a 13, Hotel „Tuzla" u Tuzli.

## Premijer Ružnić: Vlada USK će održati sjednicu Kolegija o inicijativama za rasterećenje privrede i poboljšanje poslovnog ambijenta 15. jula



Premijer Unsko-sanskog kantona Mustafa Ružnić zakazat će kolegij Vlade USK na kojemu će razmatrati inicijative Grupacije poslodavaca USK pri Udruženju poslodavaca Federacije BiH namijenjene rasterećenju privrede i poboljšanju poslovnog

ambijenta 15. jula ove godine, a svi zaključci sa Kolegija bit će razmatrani i usvojeni na redovnoj sjednici Vlade USK. Ovo je zaključak Konferencije „Partnerstvom do boljeg poslovnog ambijenta u Unsko-sanskom kantonu" održane u Bihaću 13. juna 2019. godine.

Grupacija poslodavaca USK pri Udruženju poslodavaca Federacije BiH pripremit će i Vladi dostaviti konkretne inicijative o kojima će se Kolegij i Vlada USK izjašnjavati na tematskoj sjednici. Radi se o inicijativama za formiranje koordinacionog tijela za parafiskalne namete u USK, donošenje uredbe o procjeni uticaja propisa, zatim izmjene i dopune Poslovnika o radu Vlade Unsko-sanskog kantona te inicijativa za uključivanje reprezentativnih socijalnih partnera na području USK u upravna tijela i programske

savjete javnih preduzeća. Grupacija poslodavaca USK će i Skupštini USK uputiti inicijativu za izmjene i dopune Poslovnika o radu Skupštine USK.

Premijer Ružnić naglasio je da se ova Vlada USK želi okrenuti poslodavcima, ljudima koji vode kompanije koje pune budžete i konkretno zaustavljaju odlazak kvalificirane radne snage iz BiH.

„Ovom konferencijom želimo započeti aktivnosti zajedničke saradnje, a danas želimo čuti šta je ono što možemo uraditi za poslodavce, kako da poslovni ambijent učinimo boljim, kako da omogućimo kvalitetnije uvjete za poslovanje. Vi ste ti koji ćete



nam reći šta je ono što poslodavci konkretno trebaju i što trebamo znati kako bismo vam pomogli. Za svaku dogovorenu zajedničku aktivnost ćemo odrediti nositelje i precizne rokove za njihovu realizaciju", kazao je premijer Ružnić.

Nihad Šušnjar, savjetnik za privredu premijera USK predstavio je presijek aktuelnih privrednih kretanja u USK, koja bilježe rast, ali ne dovoljan i nikako zadovoljavajući. Kao ilustraciju je naveo primjer izvoza koji na području USK u prošloj godini bilježi rast od 11 posto u odnosu na 2017. godinu, ali u ukupnom izvozu FBiH USK učestvuje sa 4,2



posto.

Ministar privrede USK Nijaz Kadirić naglasio je da su poslodavci i privreda do sada na neki način bili ignorirani.

„Naš cilj je zaista promijeniti ambijent i staviti privredu i privrednike u fokus naših aktivnosti“, naglasio je ministar Kadirić i najavio aktivnosti za poboljšanje poslovnog ambijenta koje Ministarstvo privrede i Vlada USK namjerava poduzeti u narednom periodu.

Predstavnik Grupacije poslodavaca USK pri UPFBiH Edin Ibrahimpašić predstavio je inicijative Grupacije prema Vladi USK, kao i inicijativu 20+5+6 koju je Udruženje poslodavaca FBiH dostavilo Vladi i Parlamentu FBiH.

Kolegiju Vlade USK bit će dostavljena inicijativa za uspostavljanje Koordinacionog tijela za ukidanje i smanjenje parafiskalnih nameta, tijela koje bi radilo na koordinaciji aktivnosti u vezi sa parafiskalnim nametima između Vlade USK, Ministarstva finansija USK, reprezentativnog udruženja poslodavaca sa područja kantona USK sa svim drugim tijelima i institucijama, zatim analizi opravdanosti prijedloga za racionalizaciju, ukidanje ili uvođenje pojedinih parafiskalnih nameta, ažuriranju registra parafiskalnih nameta te izradi zakona o parafiskalnim nametima i analiza njegove primjene.

Također će poslodavci pokrenuti inicijativu o donošenju uredbe o procjeni uticaja propisa. Donošenjem ove uredbe, prije donošenja ili izmjena i dopuna određenih propisa na području USK uradila bi se analiza da li postoji potreba za donošenjem

novog ili izmjenama i dopunama postojećeg propisa, a odluke bi se donosile na osnovu dokaza i prikupljenih relevantnih podataka koji će poslužiti kao smjerenice za odabir najboljeg rješenja za donošenje propisa ili za poduzimanje nenormativnih aktivnosti i mjera.



Grupacija poslovnaca USK pri UPFBiH dostavit će inicijativu za izmjene i dopune Poslovnika o radu Vlade USK, kojima bi Vlada prije usvajanja godišnjeg programa rada Vlade pribavila mišljenje reprezentativnih socijalnih partnera na području USK o

sadržaju, programa i planiranim aktivnostima. Inicijativom za izmjene i dopune Poslovnika o radu Skupštine USK, Grupacija predlaže imenovanje predstavnika reprezentativnih socijalnih partnera u radna tijela Skupštine USK, pri čemu bi imenovani članovi imali pravo učešća u raspravi bez prava odlučivanja.

Vladi i Skupštini USK bit će upućena i inicijativa o uključivanju reprezentativnih socijalnih partnera u upravna tijela i programske savjete javnih preduzeća i institucija u kojima postoji interes socijalnih partnera.



## Udruženje poslodavaca FBiH održalo sjednicu UO i ponovilo zahtjeve Vladi FBiH




Udruženje  
poslodavaca FBiH i  
Grupacije  
poslodavaca  
Tuzlanskog kantona  
održali su 29. maja  
2019. godine redovne  
sjednice upravnih  
odbora u Tuzli, odakle  
su ponovo poslali

zahtjeve prema svim nivoima vlasti. Još jednom su skrenuli pažnju Vladi FBiH na inicijativu da ova instanca vlasti krene u izmjene i dopune 25 zakona i pokrene šest inicijativa koje bi poboljšale položaj poslodavaca i poslovni ambijent u FBiH.

- Pokušavamo ulogu poslodavaca podići na viši nivo, da budemo aktivnije uključeni u sve društvene procese, da uzmemo veću ulogu i da promijenimo percepciju javnosti, s kojom nismo zadovoljni. Želimo uticati na vlasti da čuju naš glas i da naše inicijative dobiju prolaznost, kazao je predsjednik Upravnog odbora federalnog Udruženja poslodavaca Adnan Smajlbegović.

Od kantonalnih vlasti očekuju da aktivnije krenu u redukciju parafiskalnih nameta, ali i da promijeni upisne politike i nastavne programe, te da ih prilagode potrebama tržišta.





- Parafiskalnih nameta ima više od 3.000 na svim nivoima, ali vrlo je teško izračunati tu masu para. Međutim, studija Svjetske banke kaže da je porez na dobit u FBiH deset posto, što je dosta nisko u odnosu na regiju, ali kada se tome pridodaju svi ovi nameti, realna procjena je da taj porez iznosi 23 posto. Upravo zbog ovoga smo tražili da se formira komisija koja će se baviti problemom nameta. Što se tiče obrazovanja, politika upisa u srednje škole i fakultete mora se prilagoditi tržištu rada, da taj kadar možemo pustiti odmah u proizvodnju, jer jako puno poslodavaca prvo investira u kadrove, obučava ih da rade posao, iako su to trebali naučiti tokom obrazovanja, dodao je Smajlbegović.

Poslodavci u FBiH neće pratiti manji bh. entitet i zahtijevati primjenu modela poticaja koje je Vlada RS-a predložila posljednjim zakonskim rješenjem. Umjesto subvencioniranja poreza od 70 posto na svaki iznos isplaćen iznad 550 KM, poslodavci u FBiH traže manje stope doprinosa.

- To je dobar model i sigurno će doprinijeti povećanju plata i standarda, ali mi nismo razmišljali o tome, jer idemo na rasterećenje doprinosa za 20 posto, s tim da razmišljamo i o adekvatnom modelu za poticaje, kazao je Smajlbegović.

## Sastanak u vezi pokušaja iznalaženja rješenja za smanjenje gužvi i čekanja na lokaltetu tunela Vranduk II


Na inicijativu Udruženja poslodavaca Federacije Bosne i Hercegovine 14. juna 2019. godine je u kabinetu premijera FBiH Fadila Novalića održan radni sastanak sa predstavnicima JP Ceste FBiH i UPFBiH. Tema sastanka je bila pokušaj iznalaženja rješenja za



smanjenje gužvi i čekanja na lokaltetu tunela Vranduk II i mostovima Bosna IV i Bosna V, na kojima se provode radovi na rekonstrukciji.

Privrednici, naročito sa područja ZDK u više navrata su protestirali, jer obustave saobraćaja zbog obnove ovih objekata u značajnoj mjeri smanjuju privredne aktivnosti u ZDK, ali i u cijeloj FBiH.

„Nakon što JP Ceste FBiH uradi sanaciju regionalne ceste Nemila-Banlozi-Zenica što se očekuje u sljedećih desetak dana, kompletan putnički saobraćaj bit će preusmjeren na ovu cestu. Kroz jednu traku tunela Vranduk II će saobraćati teretna vozila. Na ovaj



način će zadržavanja umjesto dosadašnjih sat i po u vrijeme najgušćeg saobraćaja na lokalitetu tunela Vranduk II trajati od 15 do 30 minuta u špici, dok će mimo špice trajati i kraće", saopćeno je nakon sastanka.

Predstavnici JP Ceste FBiH na sastanku su istaknuli da je bilo neophodno uraditi asfaltiranje regionalne ceste Nemila-Banlozi-Zenica, koja je bila u katastrofalnom stanju. Također je istaknuto da bi u narednih 15-ak dana saobraćaj na ovim dionicama trebao biti dodatno ubrzan, jer je ostalo da se urade asfaltiranja još jednog dijela regionalne ceste. Iz JP Ceste FBiH su naglasili da će maksimalno ubrzati radove na rekonstrukciji tunela Vranduk II, kako bi se što prije normalizirao putnički saobraćaj na ovoj, inače, jako prometnoj dionici.

„Privrednicima sa područja ZDK, ali i cijele FBiH dosadašnji zastoji su stvarali probleme u poslovanju. Sa preusmjeravanjem putničkog saobraćaja na regionalnu cestu Nemila-Banlozi-Zenica, značajno će se ubrzati teretni saobraćaj, a samim tim će i kompanije moći ispunjavati svoje zacrtane planove i realizirati potpisane ugovore", kazao je predsjednik Grupacije poslodavaca ZDK pri Udruženju poslodavaca FBiH Kasim Kotorić.




## SDP BiH će podržati sva dobra zakonska rješenja koja je predložilo Udruženje poslodavaca FBiH



Predstavnici Udruženja poslodavaca Federacije Bosne i Hercegovine razgovarali su 03. juna 2019. godine sa predsjednikom

SDP BiH Nerminom Nikšićem i zastupnicima ove stranke u Predstavničkom domu Parlamenta Federacije BiH o „inicijativi 20+5+6“. Radi se o setu zakonskih rješenja i inicijativa koje je UPFBiH dostavilo Vladi i Parlamentu FBiH s cilje rasterećenja privrede i poboljšanja poslovnog ambijenta.

Predstavnici Socijaldemokratske partije Bosne i Hercegovine podržali su inicijative Udruženja poslodavaca FBiH prema Vladi i Parlamentu FBiH, s naglaskom da će zastupnici ove stranke u Parlamentu FBiH podržati sva dobra zakonska rješenja i inicijative koje će biti u interesu stvaranja boljeg poslovnog ambijenta, koji će omogućiti snažniji priliv investicija, usvajanje novih tehnologija u proizvodnim procesim i otvaranje novih radnih mjesta. Naročito je naglašeno da će podršku dobiti ona



zakonska rješenja koja u konačnici znače boljitak za radnike, poslodavce i državu u cjelini.

„Istaknuli smo da je Udruženje poslodavaca FBiH nakon dogovora sa predstavnicima sindikalnih organizacija FBiH spremno razgovarati i zajednički predložiti Vladi FBiH povećanje minimalne plaće, jer je i interes poslodavaca da imamo zadovoljne i motivirane radnike", kazao je Mladen Pandurević, direktor UPFBiH nakon sastanka.

Sastanak sa predstavnicima SDP BiH predstavlja nastavak aktivnosti djelovanja UPFBiH prema parlamentarnim strankama, a nakon tematske sjednice Predstavničkog doma Parlamenta FBiH na kojemu je donesen zaključak kojim je zatraženo od Vlade FBiH da razmotri prijedloge zakona i u roku od 60 dana ih dostavi zastupnicima na razmatranje i usvajanje. Do sada su održani sastanci sa predstavnicima parlamentarnih stranaka SDA, SBB BiH, Demokratska fronta, a u narednom periodu očekuju se sastanci sa predstavnicima i drugih parlamentarnih stranaka u Parlamentu FBiH.



## ILO će nastaviti podržavati Udruženje poslodavaca FBiH

Specijalni predstavnik Međunarodne organizacije rada za poslodavačka pitanja Iulia Durmea, 25. juna 2019. godine posjetila je Udruženje poslodavaca FBiH i sa direktorom Mladenom Pandurevićem i stručnom službom razgovarala o aktivnostima Udruženja i implementiranim projektima koje Udruženje provodi uz finansijsku pomoć ILO-a.

"Imala sam jako interesantan sastanak sa uposlenima u UPFBiH. Razgovarali smo o misiji i viziji Udruženja, članstvu, servisima koje nude članstvu, planovima za budućnost, glavnim aktivnostima, ali i najvećim izazovima sa kojima se susreću", kazala je Durmea.

Udruženje poslodavaca FBiH je u proteklom periodu, uz podršku ILO-a, implementiralo projekt "Zakonodavna regulativa", a u fazi implementacije je i projekat "Pružanje pravne pomoći članicama UPFBiH".

"Međunarodna organizacija rada je spremna podržati Udruženje jer prepoznajemo vrijednost ove organizacije. Dva projekta koja se trenutno implementiraju su dva vrlo ambiciozna projekta i nadamo se da će ovi projekti biti održivi u budućnosti. Danas smo razgovarali i o mogućim budućim projektima. ILO će i iduće godine sigurno podržati organizaciju da implementira neke od tih aktivnosti", istakla je Durmea.



## UPFBiH i ANUBiH o provođenju istraživanja za projekat „Harmonizacija sistema nauke u BiH“




Predsjednik Akademije nauka BiH Miloš Trifković i dopisni član ANUBiH Fikret Čaušević održali su sastanak sa direktorom UPFBiH Mladenom Pandureviće, a u vezi s provođenjem

istraživanja koje se odnosi na projekat „Harmonizacija sistema nauke u BiH“.

Naime, Akademija nauke i umjetnosti BiH u posljednje dvije godine provodi najobimnije istraživanje sistema nauke u BiH u poslijeratnom periodu sa ciljem da se, koliko to postojeća struktura u BiH dozvoljava, harmoniziraju zakoni, podzakonski akti i općenito sistem i institucije koje obavljaju naučni, istraživačko-razvojni i razvojno-istraživački rad u BiH. Projekat „Harmonizacija sistema nauke u BiH“ podrazumijeva intervjuisanje velikog broja institucija u Bosni i Hercegovini čiji je primarni posao ili dio posla naučni, istraživački i istraživačko-razvojni rad.

Predstavnici ANUBiH na sastanku sa direktorom Udruženja zatražili su pomoć u



provođenju anketa koju su sačinili u skladu sa zahtjevima i potrebama ovog projekta, kao i da Udruženje bude posrednik u organizovanju intervjua sa direktorima/ menadžerima odabranih najvećih kompanija koje svojom veličinom, raspoloživim finansijskim sredstvima i značajem za Bosnu i Hercegovinu predstavljaju ili mogu da predstavljaju vrlo značajne izvore za razvoj sistema nauke, odnosno za povezivanje naučnik institucija sa realnim sektorom i na taj način posticanje razvoja i primjene znanja u BiH.

"Neposrednim intervjuima sa rukovodstvima kompanija, omogućilo bi dobijanje izvornih informacija o ulaganjima tih kompanija u programe obuke, a posebno u njihova ulaganja u istraživanje i razvoj", naveo je Trifković.

Direktor Udruženja poslodavaca FBiH Mladen Pandurević istakao važnost produbljivanja zajedničkih znanja o postojećem stanju i čvršćeg povezivanja naučnih institucija sa poslovnim sektorom Federacije BiH, te da će Udruženje pružiti podršku projektu.

## II BH Engineering weeks 2019 bit će održan od 15. novembra do 15. decembra 2019. godine


Sastanak povodom održavanja BH Engineering weeks 2019 održan je 24. juna 2019. godine u prostorijama Udruženja poslodavaca FBiH. Na sastanku je dogovoren program BH Engineering weeks 2019 koji će doprinijeti snažnijoj i kvalitetnijoj zajednici inženjera i stručnjaka u BiH i boljoj povezanosti sa industrijom regije i Evrope. Sadržajem i izborom tema, zanimljivim predavanjima i prezentacijama te interakcijom sudionika i predstavnika realnog sektora ovaj stručni i naučni događaj potvrđuje aktuelnost i povezanost proizvodnje, industrije i razvoja gradova i inženjerstva kao najvažnije privredne grane u Bosni i Hercegovini.

Neki od događaja BH Engineering weeks 2019 će biti i međunarodne konferencije, key note, fireside chats, prezentacije, mentoring, te Poster sesije inženjerskih rješenja i ideja.



Realizacija II BH Engineering Weeks na partnerskom nivou provodi se u programskom,





izlagačkom i promotivnom segmentu i obuhvata intenzivnu suradnju svih nivoa vlasti države BiH (Vijeće ministara BiH, entiteti, kantoni, gradovi), privrednih komora, Udruženja poslodavaca FBiH, svih udruženja inženjerskih struka, stručne i akademske zajednice i medija.

"Samo umrežavanjem možemo prenositi znanja, poticati inovacije, unaprijediti konkurentnost domaće privrede i obezbijediti održiv i kontinuiran rast države zasnovan na domaćoj pameti i tehnologiji", istakao je direktor Udruženja poslodavaca FBiH Mladen Pandurević.

II BH Engineering weeks održat će se od 15. novembra do 15. decembra 2019. godine u Sarajevu, Mostaru, Banjoj Luci, Bihaću, Brčkom, Zenici i Tuzli pod sloganom: „Povežimo budućnost“.

## **Studentskom praksom brže do posla**

Potpisivanjem sporazuma 17. juna 2019. godine u Sarajevu ozvaničen je početak saradnje predstavnika akademske zajednice, poslovne zajednice, studentskih asocijacija i organizacija civilnog društva s ciljem uvođenja redovne studentske prakse, čime se želi doprinijeti većem zapošljavanju kao i ostanku mladih u Bosni i Hercegovini.

Međusektorska saradnja u sticanju prakse dio je projekta nazvanog 'Studentskom praksom brže do posla' koji provode udruženja 'Prava za sve' iz Sarajeva i 'Budućnost' Modriča, uz finansijsku podršku Evropske unije.

Direktorica Udruženja 'Prava za sve' Diana Šehić kazala je novinarima da se radi o uspostavljanju tzv. ERSE mreže (edukacija, reforma, sigurnost, egzistencija), koja obuhvata sve ono što je mladim ljudima potrebno.


- Ta mreža uvezuje akademsku zajednicu, poslovnu zajednicu, asocijaciju studenata da bismo doprinijeli reformi visokog obrazovanja u BiH, u dijelu koji definira provođenje redovne studentske prakse - naglasila je.

Dodaje da bi ta studentska praksa trebalo da bude zasnovana na dobrim modelima iz država Europske unije, a prilagođena ovdašnjem konceptu, obrazovnom sistemu i tržištu rada.



Ispred Udruženja poslodavaca FBiH Sporazum je potpisao pomoćnik direktora Zlatan Dedić koji je precizirao da su članovi Udruženja uglavnom iz realnog sektora, a današnjim sporazumom izrazili su

spremnost da studentima omoguće praktičan rad. Vjeruje da će tako steći iskustvo i što prije se uključiti u proces rada.



Resorna federalna ministrica Elvira Dilberović smatra da će taj projekt osnažiti studentsku praksu u Bosni i Hercegovini. Kaže da Ministarstvo pozdravlja tu sponu između studenata, visokoškolskih institucija i poslodavaca, te poziva da to podrže i ostali relevantni faktori.

ERSE mreža trenutno ima 35 članica (poslodavci, unije poslodavaca) iz Federacije BiH i RS, akademske zajednice iz oba entiteta, te organizacije civilnog društva koje se bave pitanjima mladih.

## **Moguća saradnja privrednika i inovatora BiH**

Direktor Udruženja poslodavaca FBiH Mladen Pandurević razgovarao je sa generalnim sekretarom Asocijacije inovatora BiH Huseinom Hujićem o mogućnostima saradnje ove dvije organizacije, budući da privrednici i inovatori predstavljaju jednu od svijetlih tačaka razvoja društva Bosne i Hercegovine.

Asocijacija inovatora BiH nastala je 1994. godine i do sada su njeni članovi proizveli 370 inovacija i dobili 1.618 priznanja. Asocijacija okuplja članove iz cijele zemlje, njih 420, od Velike Kladuše do Trebinja s jedne strane, i od Neuma, preko Posušja pa sve do Brčkog, Bijeljine.

Udruženje među članovima ima 19 doktora nauka, nekoliko univerzitetskih asistenata, profesora, dekana i jednog rektora.




## Direktor UPFBiH na zasjedanju Međunarodne konferencije rada



Od 10. do 21. juna u Ženevi se održavalo 108. zasjedanje Međunarodne konferencije rada, najvišega tijela odlučivanja Međunarodne organizacije rada.

Više od 5.000 zastupnika iz cijeloga svijeta raspravljalo je i odlučivalo o ključnim pitanjima za rad i radnike, od kršenja konvencija, preko usvajanja standarda o zlostavljanju i nasilju na radnom mjestu do rasprave o budućnosti MOR-a, koji ove godine slavi 100 godina rada, i budućnosti rada, što je i središnja tema Konferencije i inicijativa MOR-a.

Na konferenciji je sudjelovao direktor Udruženja poslodavaca FBiH Mladen Pandurević.



Međunarodna konferencija rada najvažniji je događaj u djelovanju Međunarodne organizacije rada koja je specijalizirana agencija Ujedinjenih naroda čiji je osnovni zadatak osiguranje boljih uvjeta rada i položaja radnika u cijelome svijetu te dostojanstvenog rada za sve. MOR postavlja međunarodne standarde rada, promiče temeljna prava radnika te prilike za zapošljavanje, socijalnu zaštitu i jačanje socijalnog dijaloga.

Specifičnost ove organizacije ogleda se u tripartitnom sistemu, odnosno uključenosti predstavnika vlada, radnika i poslodavaca u djelovanje organizacije kao i njihov utjecaj na kreiranje međunarodnih standarda rada (konvencija i preporuka).

ILO je osnovan 1919., nakon Prvog svjetskog rata kako bi promicao socijalnu pravdu i radnička prava kao način za osiguranje globalnog mira.

Kroz pregovore između vlada, sindikata i poslodavaca, ILO je izradio skoro 190 sporazuma i više od 200 preporuka o radničkom zakonodavstvu, uključujući konvencije o pravu na osnivanje sindikata i konvencije protiv diskriminacije, prisilnog rada te dječjeg rada.

## Održana sjednica UO Grupacije poslodavaca ZDK pri UPFBiH



Na sjednici Uo Grupacije poslodavaca Zeničko-dobojskog kantona pri UPFBiH, održanoj 20. juna 2019. godine, članovi su nakon usvajanja Izvještaja o radu Grupacije za prvih pet mjeseci 2019. godine, razgovarali o izmjeni zakonskog okvira kojim bi se

omogućilo učešće predstavnika Grupacije poslodavaca ZKD u nadzornim i upravnim organima Zavoda za zdravstveno osiguranje ZDK i Zavoda za zapošljavanje ZDK. Grupacija će tražiti od Vlade ZDK da se sprovede zaključak sa sjednice Ekonomsko-socijalnog vijeća ZDK kojim se traži da predstavnici Grupacije ZDK budu u pomenutim tijelima, te će tražiti sastanak sa premijerom Vlade ZDK kako bi se raspravljalo po ovom pitanju.

Nadalje, Grupacija poslodavaca ZDK će poslati dopise s protestnom notom Vladi FBiH i Vladi ZDK u kojima će se tražiti smjena odgovornih lica i najava tužbe protiv Cesta FBiH ukoliko se problem tunela Vranduk adekvatno ne riješi, kao i saopštenje za medije.

Također, na sjednici je donesen zaključak da se redovna godišnja sjednica Skupštine Grupacije poslodavaca održi u drugoj polovini septembra 2019. godine.

## Grupacija poslodavaca ZDP pri UPFBiH traži preispitivanje odgovornosti nadležnih u JP Cestama FBiH

Grupacija poslodavaca ZDK pri Udruženju poslodavaca FBiH dostavila je premijeru Vlade FBiH i premijeru Vlade ZDK dopis u vezi izvođenja radova na rekonstrukciji tunela Vranduk.



Naime, na posljednjoj sjednici Upravnog odbora Grupacije poslodavaca ZDK pri UPFBiH, održanoj 20. juna 2019. godine, donesena je odluka da se uputi dopis u kojem će se tražiti

preispitivanje odgovornosti nadležnih u JP Cestama FBiH.

Dopis možete pogledati [OVDJE](#).




## ESV KS: Subvencije za plin ugrađene u Prijedlog izmjena i dopuna budžeta Kantona

Prijedlog izmjena i dopuna budžeta Kantona Sarajevo za tekuću godinu razmatran je na sjednici Ekonomsko-socijalnog vijeća za područje Kantona Sarajevo.

Iznos predloženog rebalansiranog budžeta je milijardu i 55 miliona, a uvećan je za 114 miliona KM koje će biti usmjerene u kapitalne projekte i mjere Vlade koje za cilj imaju unapređenje kvaliteta života građana, rekao je ministar finansija KS Amel Kovačević.

"U rebalans budžeta se krenulo iz više razloga. Prije svega projekcije prihoda Kantona koje smo dobili od Ministarstva finansija FBiH su značajno veće od projiciranih na početku godine, te je oko 27 miliona KM sada na raspolaganju Vladi KS za dalje alociranje u započete projekte. Planirana su i sredstva za projekte unapređenja javnog prijevoza i cestovne infrastrukture kao i energetske efikasnosti koji će se finansirati iz inostranih zaduživanja, što je jedan od razloga ovog rebalansa. Cilj nam je da nemamo zastoja u projektima tokom





građevinske sezone zbog čega je ovaj prijedlog rebalansa po hitnoj proceduri upućen prema Skupštini Kantona Sarajevo", izdvojio je ministar Kovačević.

Iako su u budžetu planirana manja sredstva za infrastrukturu poslovnih zona i podršku Udruženju poslodavaca, obrtničkoj i privrednoj komori, dato je obećanje resornih ministara da će svi projekti koji su spremni za implementaciju biti finansirani.

On je izrazio je očekivanja da će Prijedlog izmjena i dopuna budžeta KS biti usvojen na sjednici Skupštine u ponedjeljak naredne sedmice.

Sredstva za subvencije gasa svim korisnicima do kraja ove godine također su planirana ovim Prijedlogom, kao i izmirenje troškova vansudskih nagodbi iz radno-pravnog odnosa uposlenih u javnom sektoru, naveo je ministar.

U ime ESV-a, predsjednik Franjo Rener pozdravio je mjere koje je Vlada KS donijela za prevazilaženje posljedica poskupljenja plina te time ispoštovala i odluke ovog tijela s prošle sjednice.

Na sjednici je prihvaćen zahtjev Udruženja poslodavaca Kantona Sarajevo da se u sredstvima koja su namjenjena za Ministarvo obrazovanja KS otvori stvaka za troškove dualnog obrazovanja.

## Koordinaciono tijelo za parafiskalne namete KS raspravljalo o izmjenama Zakona o turizmu KS i Zakona o šumama KS

Na trećem sastanku Koordinacionog tijela za parafiskalne namete KS, održanom 18. juna 2019. godine, članovi su ponovno razmatrali inicijative Udruženja poslodavaca KS za izmjene Zakona o turizmu KS i Zakona o šumama KS.



Naime, na prethodnim sastancima Koordinacionog tijela razmatrana je Inicijativa Udruženja poslodavaca KS za izmjene Zakona o turizmu Kantona Sarajevo. U cilju sačinjavanja potpune analize sa relevantnim podacima Ministarstvo privrede KS dobilo je zaduženje da prikupi

podatke na osnovu čega su određene "sa turizmom neposredno povezane djelatnosti" i na osnovu čega je izmjenama i dopunama Pravilnika o djelatnostima obaveznih članova Turističke zajednice Kantona Sarajevo iz 2018. godine proširena lista djelatnosti obaveznih članova Turističke zajednice, kao i da u saradnji sa Turističkom zajednicom Kantona Sarajevo, a uzimajući u obzir da ista nije budžetski korisnik, sačini fiskalnu procjenu izmjena Zakona na budžet Turističke zajednice te predloži modele eventualnog smanjenja stope članarine Turističkoj zajednici.

Međutim, Turistička zajednica Ministarstvu privrede nije dostavila povratne informacije koliko su pravna lica opterećena u okviru ukupnog iznosa koji se prikuplja od članarine, zbog čega se nije mogla sačiniti fiskalna procjena eventualnih izmjena Zakona.

Predstavnici Ministarstva finansija su na današnjem sastanku konstatovali da će izmjena člana u kome se riječ prihod zamjenjuje sa riječju dobit kao porezna osnovica imati značajan efekat na prihode Turističke zajednice, ali zbog nedostatka povratne informacije od strane Turističke zajednice nije moguće taj efekat precizno utvrditi.

Član Koordinacionog tijela ispred Udruženja poslodavaca KS Zlatan Dedić je inicirao da se Inicijativa Udruženja poslodavaca KS proslijedi Vladi na razmatranje i donošenje konačnog Zaključka kojim će zadužiti Turističku zajednicu da se uključi u aktivnosti izmjene Zakona. Inicijativa Udruženja poslodavaca osim izmjena osnovice, podrazumjeva i izmjene vezano za poreske obveznike.

Nadalje, donesen je zaključak da se prema Vladi KS uputi Inicijativa Udruženja poslodavaca KS za izmjenu Zakona o šumama KS u kojoj su predložene smanjenje stope naknade za korištenje opšte korisne funkcije šuma sa 0,07 posto na 0,05 posto ili ukidanje naknade za korištenje opšte korisne funkcije šuma, s ciljem da Vlada KS odabere jednu od razmatranih opcija i zaduži Ministarstvo privrede KS da pokrene proceduru izrade Izmjene I dopune Zakona o šumama KS.



## Nove članica UPFBiH - Udruga gospodarstvenika Posušje i AHM d.o.o. Lukavac

Na Skupštini Udruge gospodarstvenika Posušje, održanoj 19. juna 2019. godine, donesena je odluka o kolektivnom učlanjenju Udruge u Udruženje poslodavaca FBiH.

Udruga gospodarstvenika Posušje je slobodna, dobrovoljna, neovisna i nepolitična Udruga pravnih osoba iz općine Posušje, koje ispunjavaju uvjete i prihvaćaju prava i obveze iz Statuta Udruge, utemeljena radi unaprjeđenja i ostvarivanja zajedničkih ciljeva, aktivnosti i interesa svojih članova u razvoju privrede u općini Posušje.

Članovi Udruge su ugledna i uspješna privredna društva iz općine Posušje, a u Udruzi je 45 članova.

Udruga gospodarstvenika Posušje utemeljena je na utemeljiteljskoj Skupštini dana 29.10.2011. godine.

Više o Udruzi gospodarstvenika Posušje na [linku](#).

AHM d.o.o. je kompanija čiji je primarni biznis proizvodnja mašina za industriju kartonskih pakovnja. Shodno tome odjeljak kompanije je posvećen obradi metala sa konvencijalnim i CNC strojevima za obradu metala. Vođeni iskustvom iz oblasti proizvodnje mašina, AHM razumije zahtjeve drugih kupaca koji imaju potrebu za mašinskim djelovima, te nastoji pružiti najkvalitetnije moguće proizvode. Cjelukupna proizvodnja je usmjerena na inostrano tržište.

Više o kompaniji na [linku](#).





# UDRUŽENJE POSLODAVACA

---

**UDRUŽENJE POSLODAVACA FBiH**

**MULA MUSTAFE BAŠESKIJE 12/3, 71 000 SARAJEVO**

**TEL: 00 387 264 830**

**FAX: 00 387 33 552 461**

**MAIL: [info@upfbih.ba](mailto:info@upfbih.ba)**

**WEB: [www.upfbih.ba](http://www.upfbih.ba)**